

工部則例

都水司
河工
船政
水利
水橋
海道
織造
器用
藏冰

四冊
二冊
二冊
二冊
二冊
二冊
二冊
二冊



工部則例

都水清吏司

河工一

一職掌。順治初年。設河道總督一人。駐劄濟寧

州。後移駐清江浦。綜理黃運兩河事務。通惠河分司一

人。駐劄通州。北河分司一人。駐劄張秋。南旺分

司一人。駐劄濟寧州。夏鎮分司一人。駐劄夏鎮。

中河分司一人。駐劄呂梁洪。南河分司一人。駐

劄高郵州。衛河分司一人。駐劄輝縣。分管所屬

境內歲修搶修等事。○康熙四年。裁衛河分司。



歸於彰衛懷道管理。○十五年。裁南旺分司。歸濟寧道管理。又裁夏鎮分司。所有滕嶧二縣河道各牘。歸東兗道管理。沛縣河道各牘。歸淮徐道管理。○十七年。裁北河分司。分歸濟寧。天津二道管理。又裁中河南河分司。分歸淮揚。淮徐二道管理。○又議準。滕縣河務。改歸濟寧道管理。○又覆準。河南歲修工程。暫交該撫料理。俟江南大工告竣。仍照舊例。總河親勘具題。○又議定。河南山東。特設管河道官。一應督修挑築。辦料諸務。均令河道協同催趲。聯銜會詳。一體

責成。○二十二年

諭。河工關係緊要。蘭家渡決口築塞方完。河南隄岸工程。專令河南巡撫暫行料理。如有應會總河事務。仍移文商推毋誤。欽此。○二十三年

諭。朕觀高家堰地勢。高於寶應高郵諸水數倍。前人於此作石隄障水。實為淮揚屏蔽。且使洪澤湖與淮水并力敵黃。衝刷淤沙。關係最重。今高家堰舊口及周家橋翟壩。修築雖久。仍須歲歲防護。不可輕視。以隳前功。欽此。○又

諭。蕭家渡九里岡崔家鎮徐升壩七里溝黃家嘴新莊

一帶皆緊要近溜之處。甚爲危險。所築長隄與逼水壩。須時加防護。大約運道之患在黃河。禦河全憑隄岸。若南北兩隄修築堅固。可免決齧。則河水不致四潰。水不四潰。則濬滌淤墊。沙去河深。隄岸益可無虞。今諸處隄防雖經整理。還宜培薄增卑。隨時修築。以防未然。又如宿遷桃源清河上下。舊設減水諸壩。蓋欲分洩漲溢。一使隄岸免於衝決。可以束水歸漕。一使下流疏洩。可無淮弱黃強清口噴沙之患。近來凡有決工。皆仿其意。不過暫濟目前之急。雖受其益。亦有小損。倘遇河水泛溢。乘勢橫流。安保今日減水壩。

不爲他年之決口乎。當籌畫精詳。使黃河之水順軌東下。水行沙刷。永無壅決。則減水諸壩。皆可不用。運道既免梗塞之患。民生亦無墊溺之憂。庶幾一勞永逸。河工可告成也。欽此。○三十二年奉

旨。河南工程。不必行總河往勘。照該撫所請修築。○三十六年

諭海口爲黃水入海之道。所關甚屬緊要。河道總督每年委賢能河官專管修理。勿致壅滯。欽此。○三十七年。設永定河分司。○三十八年

諭朕審視黃河之水。見河身漸高。登隄用水平測量。見

河較高於田。行視清口高家堰。則洪澤湖水低。黃河水高。以致河水逆流入湖。湖水無從得出。泛溢於興化鹽城等七州縣。此災之所由生也。治河上策。惟以深濬河身爲要。諸臣並無言及此者。誠能深濬河底。則洪澤湖水。直達黃河。七州縣無泛溢之患。民間田廬。自然涸出。不治其源。徒治下流。終無裨益。今朕親閱下河到海之口。及射陽湖一帶淤墊之處。總河所帶効力人員甚多。可速分委。并力開濬。蓄積之水。倘能稍洩。亦有益也。至於黃淮交匯之口。過於徑直。所以黃水常逆流而入。今宜將黃河南岸近淮之隄。更

迤東長二三里。築令堅固。淮水近河之隄。亦迤東灣曲拓築。使之斜行會流。則黃水不致倒灌入淮矣。再河流不迅急。無以刷去河底之沙。河直則溜自急。溜急則沙自刷。而河自深。宜於清口之西數灣曲處。試行濬直。如直濬有益。漸將上流曲處。歲加直濬。庶幾黃河之險自除。而河底漸深。洪澤湖之水漸出。七州縣之水患可漸息矣。欽此。○四十年覆準。裁通惠河分司。歸通永道管理。○四十四年奉

旨。直隸山東河道。與總河相距甚遠。應照河南例。令各該巡撫就近料理。○四十八年

諭。河防緊要。不可稍忽。宿遷以下。有清水入黃河。得以刷沙。遙行。宿遷以上。至河南一帶。無清水入黃河。必須將兩岸隄工。小心修防。令水不出漕。導水由漕中行。無淤沙之患。至於黃河發水。由上源寧夏而來。著陝西總督轉行寧夏同知。遇黃河長水時。速報總河。河南巡撫。預為修防。欽此。○雍正二年議準。以河南武陟中牟等縣隄工緊要。設副總河一人。管理豫省河務。○三年覆準。豫省增設河官。凡歲修搶修。均令河汛各官專司其事。倘遇緊要大工。仍令沿河印官。與汛河各官協同辦理。○四年

諭。近年豫省河務。險工下移。隄岸完固。山東河務。甚屬緊要。向係山東巡撫管理。但巡撫有地方責任。恐不能兼理河務。山東與河南接壤。令副總河兼管。欽此。○又議準。直隸河道。分為四局。南運河。與臧家橋以下之子牙河。苑家口以東之淀河。為一局。令天津道就近管理。舊有天津同知。泊河同知。暨各地方管河同知。通判。縣丞。主簿等官。悉歸管轄。永定河。分為一局。將永定河分司。改為河道。駐劄固安縣總理。其沿河州縣。各增設丞簿等官。以資分防。除所有同知一人外。將向來効

力人員。一概撤回。運河分爲一局。撤去分司。歸通水道兼管。其管河州判等官。悉歸管轄。苑家口以西各淀。及

畿南諸河。爲一局。將大名道改爲清河道。移駐保定府。舊有管河同知通判州判丞簿等官。悉歸管轄。○又議準。設江南葦蕩營叅將一人。守備二人。○五年議準。黃河南岸劉家口壩工。歸商虞二縣就近管理。○又奏準。豫省險汛下移。於開封府南岸。增設主簿一人。管理開封府下北河。增設巡檢二人。一駐祥符陳留適中之地。一

駐蘭陽儀封適中之地。遇險要工程。協同廳汛各官辦理。其祥符北岸汰黃隄一道。亦令管理修墊。○六年議準。江南河營。設叅將一人。統轄淮徐九營。淮揚十一營。每營設守備一人。淮徐淮揚。各設遊擊一人。除舊存七營外。如額建設。以專責成。○七年

諭。治河之道。惟有使黃水暢流。無所壅滯。則永慶安瀾。然使黃水無所壅滯。必須保固高家堰隄工。使清水力能敵黃。且以助其暢流之勢。從前總河雖將石工稍加幫修。不若多費帑金。於隄工險要之所。及卑薄

之處皆加修石工。務令堅固高厚。以爲久遠之計。欽此。○又

諭。副總河專理北河。總河兼理南北兩河之事。今朕欲分任南北兩河。又思治河之道。必合全河形勢。通行籌畫。方可疏導安瀾。若分令兩人管理。亦有推諉掣肘之處。著詳悉速議具奏。欽此。遵

旨議準。河之南北。因地而分。其原委分流。本屬一貫。河臣雖分兩人。而辦事應如一體。請授總河爲總督江南河道提督軍務。授副總河爲總督河南山東河道提督軍務。分管南北兩河。其有江南

河東修理工程。令公同商酌。會稿具題。倘遇緊要搶修。一面堵築。一面知會。不得藉會商爲名。以致遲誤工程。至題補河官。及奏銷錢糧等事。仍令分辨。○又議準。設河南豫河懷河守備各一人。○八年議準。設直隸河道總督一人。○九年議準。增設石經山同知一人。屬永定河道管轄。○又覆準。山東運河。一應修築隄岸牯壩工程。均責令管河廳汛等官。分司修防。不得推諉。倘有疎虞。題叅賠修。如別項大工。仍令地方官與管河各官分段修築。○又覆準。江南邳睢同

知。照舊管黃運兩河工程。宿虹同知專管黃河兩岸百四十餘里。並將宿桃中河通判舊管黃河葉家莊竇家林等工。歸於該同知管理。宿桃中河通判。改爲宿遷運河通判。管理宿遷至古城運河兩岸子隄長九十里。並將宿虹廳舊管安清中河通判。改爲桃源安清中河通判。原管運河自桃源三岔起至清河縣楊家莊止。兩岸子隄。又運鹽中河一道。自運口沿河牆起至安東縣止。並將宿桃中河通判舊管古城以下至

三岔運河兩岸子隄。歸於該通判管理。海防同知。原駐廟灣。應移駐童家營適中之處。改爲分管山安南岸河務海防同知。將外河廳南岸工程之內。自新港頭工起至山安交界陳家社。計長百有五里。又山安廳南岸工程之內。自陳家社起至陶家社竈土隄尾止。計長六十一里。歸并該同知就近管理。增設巡檢把總各一人。管理原屬外河廳所管上河汛新港頭起至葉家營止。工長六千二十有七丈。江防同知。改爲揚河江防同知。駐劄瓜州。原管江口及三汊河迤

南河道二十五里。將揚河廳工程之內。自邵伯迤北高江交界三十里鋪起至三汊河止。兩岸各工長八十里。分歸管理。○十年議準。設江南河庫道。○十二年議準。設山東運河道。○又議準。直隸復設大名道。兼管河務。并增設永定河北岸同知。三角淀通判。○乾隆元年

諭。治河之道。在因其勢而利導之。司河務者。必將全河形勢熟悉胸中。隄防疏濬。在在得宜。始可以行所無事。而致安瀾之慶也。黃河自河南武陟至江南安東入海。長隄綿亘二千餘里。舊設總河一人。

駐劄清江浦。雍正七年。復設河東總河。誠慮鞭長不及。故俾南北分隸。各有責成。惟是河流日久。變遷舊險既去。新險復生。其間防浚事宜。有病在上流。而應於下流治之者。有病在下流。而應於上流治之者。必須通局合算。同心協理。庶無顧此失彼之憂。若河臣於南北形勢未能洞悉。遇有開河築隄等事。或至各懷意見。彼此參商。則上游下游。必有受弊之處。所關匪細。徐州府當南北之衝。爲兩河關鍵。最爲緊要。見設南河副總河。應移駐徐州。以專督率。如兩河有應會商事宜。就近可與南北

河臣公同踏勘。應開浚者。即行開浚。應堵築者。即行堵築。毋得推諉。亦無得掣肘。於河務似有裨益。著江南總河。河東總河。確議具奏。欽此。遵

旨議定。副總河移駐徐州。凡兩河應行會商事宜。即就近與南北河臣公同勘議。立即舉行。其毛城舖等處減水插壩。就近督率徐屬廳營。按時啟閉。隨宜辦理。如病在上流。而應於下流治之者。北河臣預爲知會副河臣。與南河臣踏勘。定議興工。如病在下流。而應於上流治之者。南河臣亦即知會副河臣。與北河臣踏勘。定議興工。如

上流開河築隄有礙。下流開河築隄有礙。上流。並知會副河臣。會勘妥議。其動用錢糧。仍照南北工程定例。○又議準。山東增設黃運河守備一人。○二年。撤回江南副總河。○又議準。江南徐屬同知。改爲銅沛同知。並增設豐蕭碭通判一人。其餘十五廳。仍舊管理。○又議準。山東東平濟寧二州泉務。令各該州州同管理。汶上。滕。鄒。泰安。滋陽。寧陽。六縣泉務。令各該縣縣丞管理。平陰。萊蕪。肥城。三縣泉務。令泰安府經歷管理。蒙。理。曲阜。泗水。二縣泉務。令兗州府經歷管理。蒙

陰縣泉務。令沂州府經歷管理。新泰縣泉務。令該縣上泗莊巡檢管理。嶧縣泉務。令滕縣縣丞兼管。魚臺縣泉務。令濟寧州州同兼管。仍聽管泉通判管轄。其地方一切公務。管泉各官。均免其差委。至該州縣泉源泉河。及蔭泉樹木。沿河柳株。均責令該員督率泉夫。不時疏濬栽植。倘因循怠惰。泉務廢弛。即將專管之官叅究。如通判不實力巡察。通同徇隱。該督撫一并叅處。至冬間。協挑運河。亦令該員管押。其有泉州縣印官。改爲兼管官。令其稽察催趲。仍令管泉通判。

不時巡察所屬。如泉流暢達。樹木繁茂。有益運道。該河道總督酌量具題。予以議叙。○又奏準。巡視山東漕運御史。與河臣協同督察大濬小濬工程。○三年

諭。毛城鋪工程。漸次就緒。但此地至洪澤湖。河湖水道。六百餘里。經過十數州縣。土壤相錯。若無專官統轄。則丞簿微員。呼應不靈。所有一切隄岸壩座工程。未必經久堅固。况見在修防疏濬。尚須逐年料理。則歲修之費。當預為籌及者。著總河會同總督。悉心妥議。於就近廳員中。歸并何官管轄。並酌

定歲修之費若干。每年冬末春初河水未發時。相度修治。俾地方永受其益。欽此。遵

旨議準。毛城鋪減水壩。迤下河道。令豐蕭碭河務通判。銅沛河務同知。邳睢靈壁河務同知。宿虹河務同知。山盱河務通判。各照所屬地方。分界管理。子堰或經卑薄。河道間有淤阻。均令隨時修補疏導。○又議準。河南商邱虞城二汛隄工。應清界址。虞隄自一堡至火神廟止。長千有五十丈五尺。改撥商汛。與商隄相接。商隄自五虎廟東埠口至蕭家莊止。長千九十一丈。改撥虞汛。

與虞隄相接。曹縣越隄一段。長百八十八丈。東九十四丈。改撥虞城上汛。西九十四丈。改撥商邱汛。則工段聯絡。便於巡防。○四年議準。設河南儀考通判。○又議準。設永定河營守備。○又奏準。洪澤湖發源桐柏淮泗及七十二谿等處。間歲冬春。河臣會委大員。將河形水勢通塞衰旺。以及分支合流。可引可截各情事。詳細勘明。預為酌定。○五年議準。設河南曹儀通判。○又議準。山東兗沂曹道。兼管黃河工程。○又議準。總河所轄漕河。每年應詳按形勢。察明脈絡。凡

各處泉河淀泊。以及支河汊港。關係濟運之處。窮源溯委。將道里遠近。見在隄身高寬丈尺。何處發源入漕。何處洩水歸宿。并將各隄牘壩。舊制新增更改事宜。逐一分晰。繪圖粘單。呈送到部。以備稽考。○六年議準。裁直隸祁河通判。改設子牙河通判。○七年覆準。河南彰德懷慶二府通判。各令兼理河務。○九年奏準。江南淮徐淮揚二道。原係分巡兼管河務。但河工關係緊要。該二道有管轄廳汛之責。嗣後應令其專管河道。○十四年奉

旨。直隸河道。令總督兼管。又設江南協辦河務官。職掌與副總河同。○十六年

諭。洪澤湖上承清淮。汝潁諸水。匯為巨浸。所以保障者。惟高堰一隄。天然壩乃其尾閘。伏秋盛漲。輒開此壩洩之。而下游諸縣。胥被其患。冬月清水勢弱。不能刷黃。往往濁流倒灌。在下游居民。深以開壩為懼。而河臣轉藉為防險秘鑰。二者恒相持。朕南巡親臨高堰。循隄而南。越三滾壩。至蔣家牘。周覽形勢。乃知天然壩斷不可開。夫設隄以衛民也。隄設而民仍被其災。設之何用。若第掣流緩漲。自保

上游搶險各工。而鄰國為壑。田廬淹沒。弗復顧惜。此豈國家建立石隄保障生靈本意耶。為河臣者。固不當如此存心也。天然壩當立石永禁開放。以杜絕妄見。近者河臣等。於開天然壩亦深以為非。而請於三滾壩外增建石滾壩。以資宣洩。朕親臨閱視。謂增三為五。即以過水一二尺言之。向過三尺者。即為五尺。向過六尺者。增而至丈。是與天然壩名其實同。人必有議其巧避開壩之名。而陰襲其用者。是當為之限制。上年滾壩過水三尺五寸。天然壩仍未開放。應即以是為準。俾五壩石面高。

下維均。以仁義禮智信為之次。仁義禮三壩。一如其舊。智信二壩。則於石面之上。加封浮土。必仁義禮三壩。已過水三尺五寸。猶不足以減盛漲。則啟智壩之土。仍不減。乃次及於信。斯為節宣有度。較之開天然壩之一往莫禦者。懸殊矣。再高堰石隄。至南滾壩以南。舊用土工。石隄有首無尾。形勢不稱。應自新建信壩北。雁翅以北。一律改建石工。南雁翅以南。至蔣家壩。水勢益平。則石基軌甃。如此方首尾完固。屹如金湯。永為淮揚利賴。至洪湖束水。藉以刷黃。而上游宿虹鳳潁諸邑。歲被水患。議

者謂洪湖盛漲。諸邑先被其災。洩洪湖仍於上游無補。自朕觀之。漲減則上游之漫溢者亦減。此固在封疆大吏。於未被水時。先事綢繆。而司水土者亦未可謂閭閻休戚。非已職掌所在。而專以束水保隄為得計也。河工宿弊。不可枚舉。而無益之費尤多。或明知無用。而因循不廢。或陰以為利。而妄事興修。即以朕巡視高堰一隄之內。已不勝屈指數。然觀河臣管領河漕。數千里民命所繫。視督撫綏緝一二省者為難。冒涉風雨。守護隄防。亦視督撫坐辦案牘者為勞。而督撫職在刑名錢穀。事有

實據。是非難掩。河臣遵守章程。可以福命苟安無事。則其任較易。歷來河臣不乏表表尸祝之輩。而糜帑養患。有罪無功。其識機宜。得關鍵。實著功效者幾人哉。果使全不興工。則置民瘼於不問。河臣幾於虛設。固無此政體。如其糜脂膏以擲虛牝。則盡弊之最巨者。總之河不可不治。而無循其虛名。工不可不興。而必歸於實用。我

皇祖聖祖仁皇帝。屢幸南河。

躬親指示。平成睿略。萬世永賴。朕何能仰企一二。即經臨視有所籌畫。亦不敢自信為必不可易。惟愛養

黎元揆理度務。崇實敦本。兢兢業業之衷。可共白耳。將此詳悉宣諭中外臣民。其庀材興工。一切應行事宜。河臣會同督臣。按例確估具題。欽此。

一河兵。江南。河兵九千一百四十五名。內食戰糧者千八百二十九名。葦蕩營樵採兵千四百十有九名。內食馬戰糧者六十名。步戰糧者五十九名。山東。河兵六百名。內食戰糧者百二十名。河南。河兵千一百名。內食戰糧者二百二十名。直隸。永定河。河兵千二百名。內食戰糧者百二十名。石景山河。河兵三十名。內食戰糧者三名。

北運河。河兵六百名。內食戰糧者六十名。南運河。河兵三百名。內食戰糧者六十名。子牙河。河兵四十名。均食守糧。○順治十二年。設江南河兵。○康熙十七年。議準。江南鳳淮徐揚四府。裁去淺溜等夫。設兵五千八百六十名。○十八年。覆準。江南河營。增兵五百餘名。令各營弁督率。防守濬築。○三十七年。設永定河。河兵二千名。○三十八年。題準。裁徐屬州縣額設歲夫六千九百五十名。改設河兵三千三十名。○四十年。覆準。裁永定河。河兵千二百名。留八百名。在工

防護。○五十九年題準。裁徐屬河兵千二百三十名。仍留千八百名。以資防守。○雍正二年題準。撥江南河兵千名。赴河南防守。○三年議準。山東運河緊要。照河南之例。於江南額設河兵內。選二百名。安插險要地方。其江南河兵空闕。即於濱河傭夫內。選其熟練河務者。頂補。○又議準。河南堡夫。募精壯丁男。補額。擇其諳練工程者。每年於江南河兵更換之時。準其拔充河兵。俟數滿五百名。將江南河兵停其調撥。○三年。增永定河河兵四百名。○五年。

諭。黃河下埽之人。辦理工程。不惜身命。當照軍功例。定以恩卹。欽此。遵

旨議定。嗣後黃河下埽之官兵。如在事遭險。入坎幸生

者。照軍功保守在事有功例。官加一級。兵夫以一等軍功傷例給賞。身故者。官不論銜級大小。照軍功陣亡例。以見在職分。準廕加贈。給祭葬銀。外委官弁以及兵丁夫役。亦照軍功陣亡例。分別給以祭葬銀。如無親屬者。照例委官致祭。○十二年議準。河兵於霜降後。工務稍閒。計兩月日期。照堡夫例。每兵二名。每月積土十五方。

貯於隄工備用。造冊入於該管備弁交代項下。如有闕少。照堡夫積土之例。分別叅處。○乾隆元年

諭。江南河工。額設二十河營。兵丁九千一百四十五名。內戰糧百四十六名。月給銀一兩五錢。守糧八千九百九十九名。月給銀一兩。專供力作。修護工程。胼手胝足。經歲勤勞。內有樁手一項。更為緊要。身冒危險。勞苦尤多。祇因額設戰糧無幾。各營樁手。大率照衆食糧一分。勞異而餉同。可為軫念。著將額設河兵九千一百四十五名。改為戰二守八。

設戰糧千八百二十九名。守糧七千三百十有六名。俾勤勞較多之樁手。均得領食戰糧。以示加恩優卹之意。此所改戰糧。每名每月增銀五錢。共增銀萬九千餘兩。著照例於外解河銀內一并動支報銷。欽此。○又議準。河南豫河懷河二營。河兵千一百名。內原撥看守浚柳船兵三百四十名。應撤回各歸本汛修防。其浚柳船。別行募夫。○又奏準。嗣後歲修搶修鑲填工程。須用土方。河兵擔運十分之四。夫役擔運十分之六。○又議準。直隸運河。額設淺夫六百三名。有奇。盡行裁去。

改設河兵六百名。○二年

諭。河營內有樁手一項。下埽簽樁。履危蹈險。較之力作兵丁。更為辛苦。前江南二十河營兵丁。改為戰二守八。俾樁手均食戰餉。以賞勤勞。而河南山東尚循舊制。所當照江南之例。一體加恩者。著將河東二省河兵。亦改為戰二守八。使用力較多之樁手。得食戰糧。以示朕慎重河防優卹戎行之至意。欽此。○九年覆準。山東運捕加三廳河夫。改設河兵四百名。分隸濟寧衛。東平所。東昌衛。各千總管轄。官兵俸餉。照黃河官兵之例。自乾隆九

年始。於本省司庫田賦銀內動支。

一夫役。江南堡夫二千三百有八名。每名月給銀五錢。樁夫三百八十名。內百八十名。每名歲給銀十兩六錢二分。餘每名月給銀六錢。山東堡夫二百三十七名。月給銀同江南。黃河徭夫千三百有八名。運河徭夫七十五名半。均每名月給銀一兩。樁夫千三百三十有六名。每名月給銀一兩二錢。淺夫千一百五十三名半。壩夫九十八名。軍夫五十八名半。橋夫五十二名。渡夫二名。均每名月給銀一兩。泉夫七百八十四

名。每名歲給銀十兩。運河大濬。額募夫六千二十四名半。小濬。千二百五十五名。均日給銀五分。河南堡夫千三百九十有六名。月給銀同山東。柳船長夫二十六名。每名歲給銀八兩。埽工長夫三十名。椿埽夫四十名。均每名月給銀一兩。直隸。三角。淀祿夫二百四十名。子牙河津軍廳。堡船祿夫各三百名。西淀堡船祿夫二百四十名。均每名月給銀五錢。北運河祿夫百八十八名。淺夫三百名。均每名月給銀一兩二錢。水手四十八名。插夫六十四名。漳河防夫十有二名。

均每名月給銀一兩。○順治十二年定。令河臣嚴察河工官吏扣折夫食。以蘇民困。○康熙十二年議準。停止河南簽派河夫。如遇歲修。動河道錢糧雇募。每夫一名。月給銀二兩。○十三年覆準。江南河夫。亦停簽派。如河南之例。動河道錢糧召募。○十五年覆準。夏鎮分司所設淺溜夫。南旺分司所設泉夫。盡行裁去。北河分司所設額夫裁半。餘皆照額留用。○十六年題準。河南募夫。每名每月給銀一兩二錢。照江南例按日散給。○二十年題準。裁通州及武清香河寶

坻永清東安諸縣淺夫。其額設夫役銀。歸通憲河分司雇募挑濬。○二十三年

諭。隄工夫役。風雨晝夜。露宿草棲。勞苦倍常。所領工食無幾。恐有不肖官吏。從中侵蝕。必使人沾實惠。不可不加意軫卹。欽此。○三十七年。設直隸河工淺夫。○四十年。議準。河工夫役。工成之日。內有民夫。各給印票。該地方官察驗。免其雜項差徭。○四十六年。議準。設順天所屬會清河以下七牘。牘夫百十有二名。○雍正元年

諭。山東運道淺阻。舊例分撥民夫。濬淺濟運。山東連年

薄收。百姓未必堪此重役。不若竟動正項錢糧雇募。於興役之中。即寓振濟之意。莫便於此。欽此。○四年。議準。直隸河工。設役夫千二百六十名。分隸於各廳汛。○又議準。山東濟運諸泉。各州縣均有額設泉夫。少則不敷。多則糜帑。應酌量增減。所有役食銀。於幫貼項內給發。○五年。覆準。徐塘口以下勝陽山等處。新建三牘。每牘各設牘夫三十名。○又議準。豫省河工。社夫名色。永行禁止。○又題準。東省黃河廳所屬州縣。額設徭夫千三百名。每年十一月十二月正月空工。應扣

除役食外。每名每歲給銀九兩。各州縣預造名冊。解送該廳點驗。分汛供役。遇有險要。即調集搶護。○七年議準。東省運河。額設淺溜橋牐等夫。除歲給役食銀外。每歲各量給器具銀八錢。各州縣額編役食銀三萬二千二百四十兩有奇。其不敷銀。於幫貼項下取給。遇閏加增。至大小濬募夫。日給工銀六分。每人給器具銀二錢。○八年覆準。豫省堡房五百十有二座。如遇州縣官升遷事故。令其造入工程錢糧交代冊內。如有破損。照不修礮臺烽墩例議處。○又議準。

豫省河工。增設堡夫三百四十名。○九年議準。江南黃運兩河隄岸。每二里蓋堡房一座。設夫二名。共建堡房千一百五十四座。設堡夫二千三百八名。歸該管官弁管束。住宿堡內。常川巡守。每日責令挑積土牛。以資修補隄工之用。○十一年議準。直隸運河。歲需疏濬。應設淺夫六百三名半。○十二年議準。黃河一堡二夫。寒暑兩月。免其積土。每月積土十五方。運河一堡二夫。糧船往返。修補犁溝。每月積土十二方。該管汛官。各將堡夫所積舊土。報明備案。以雍

正十二年正月為始。每名每月如數挑積。造於新土冊內彙報。並入交盤。以專責成。○十三年議準。東省有泉之十七州縣。泉夫七百八十四名。自雍正十三年為始。每名歲給銀十兩。在各州縣地畝銀內。照河夫幫貼之例。攤入大糧。減正加耗。分徵支給。歲以春夏秋三季。在本境浚泉栽柳。冬季調赴運河。一例均令濬淺。○乾隆

元年

諭。河南武陟縣木樂店沁河隄工。關係居民廬舍。每年定為民夫修築。以防水患。里民按畝攤錢。計二

千四百餘緡。頗為地方之累。若設立長夫三十名。歲支工食三百六十兩。即可省民間二千餘金。著河南總河照此辦理。其長夫工食。即動豫省存公銀。不得絲毫累民。永著為例。倘胥吏土豪。仍借名科歛。從重治罪。欽此。○又議準。豫省浚柳船六十。二。向撥河兵看守。今河兵既各歸本汛巡守。應募長夫六十二名。每名歲給銀八兩。運料之時。加募水手。浚船三名。柳船五名。每名日給銀五分。○二年覆準。河南孟縣小金隄。設樁埽夫四十名。每名歲給銀十有二兩。遇閏加增一兩。○

三年覆準。東省疏濬運河。除器具銀之外。每夫日給工銀五分。以為定額。○又奏準。東省滕汛彭口。大濬募夫三百名。小濬百名。均屬不敷。應於嶧汛募夫大濬四百名。小濬二百名內。各減去百名。歸於滕汛募用。○又覆準。江南新建之正二牘。仍名通濟。正三牘。仍名福興。龍汪牘。仍名清江。其淤閉之廣濟牘。別築草壩。原設牘夫三十六名。以三十名隸通濟牘。清江牘。原設牘夫三十三名。應減去三名。福興牘。應設牘夫三十名。即將廣濟清江二牘。所減牘夫九名。撥用

外。再召募二十一名。以符額數。○五年覆準。黃運湖河隄工。額設堡夫。所積土牛。改築子堰。每夫二十名內。選撥六名。撥水夯礮。免其積土。○六年奏準。裁豫省浚船長夫四十名。○十年議準。東省距河寫遠之泉夫。協濬運河。皆非素諳。每名額支工食銀十兩。嗣後扣除六兩。歲於霜降前。照數於司庫內撥解河庫。轉發沿河州縣。代為雇募。如有餘剩。仍令節存道庫。以為大小濬通融辦理之用。餘銀四兩。仍照舊例。按名支給。祇令在本境疏泉栽柳。計沿河泉夫。滕縣四

十名。嶧縣二十名。魚臺縣二十名。濟寧州九名。汶上縣四十三名。東平州七十八名。內除八名撥防戴村壩。例不濬河。共泉夫二百二名。均係沿河近便。仍令照舊協濬。毋庸扣銀別募。其距河寫遠之泰安縣泉夫百二十一名。平陰縣泉夫十名。令汶上縣代募。萊蕪縣泉夫九十名。肥城縣泉夫三十五名。令東平州代募。新泰縣泉夫七十五名。令東阿縣代募。寧陽縣泉夫六十一名。令嘉祥縣代募。泗水縣泉夫六十名。曲阜縣泉夫四十名。鄒縣泉夫三十名。滋陽縣泉夫

三十六名。蒙陰縣泉夫十有六名。均令濟寧州代募。○十一年議準。直隸運河。向設淺夫六百三名半。嗣於改設河兵案內。全行裁去。但每歲運河堰淺。究非河兵所素習。除零數不計外。應酌復舊額之半。設淺夫三百名。每名月給銀一兩二錢。照北運河祿夫之例。動支紅撥銀給發。報部覈銷。

